



Tir Yimiyim

www.tiryimiyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimiyim@gmail.com

TAPAK 8

Yangia anidakangma : Tir Yimiyim


tiryimiyim@aolima

tir yimiyim

TAPAK 8

Aryan Sabalenka-i US Open takok korang ngutetogo

Erdogan-i Israel anema Islamic linük lungjemtsü ayongzük



VOL. XXI ISSUE NO. 327 (ADOK 327) DIMAPUR TENTONÜ (MONDAY) RONGJUI (SEPTEMBER) 09, 2024 ₹ 5.00

India nung tang mezüing Mpox putetogo GNF-i "Matikhrü massacre" bilemteta among



New Delhi, September 8, 2024

(Agencies): India nung tang mezüing Mpox (Monkeypox) putetogo aser iba ya asangur ka Mpox wara aliba linük ka nungi meyipa aruba sülen putetba lir.

Union Health Ministry-i Mpox putetba yimi tenüing temai adoka mashir saka pa mozü ki ka nung isolation nung yua lir aser temang junga lir ta metetdaksüogo.

Health ketdangsürtemi pa dak Mpox virus jangjatsü atema diagnostic tests agidar aser pa ajanga menatepa aoer metettsü atema contact tracing tenzükogo.

"National Centre for Disease Control (NCDC)-i tesüiba nung asadanga den iba nisung dak puteta lir saka aoksateptsü nüngdak madoker" at Union Health Ministry-i ashi.

Mpox ya mpox virus (MPXV) ajanga menateper aser iba virus menaba ajanga nisung ka temang metar, tekolak angor,

temang ngoyangoshir, teberem angor, tashimait akümer aser lymph nodes awakba den hopta ana nungi asem tashi temang nung komo adoker.

Iba ya mapang tatsüka atema dang shirangba tashidak ka lir saka tanurtem aser immune systems tashimaitertembo tasüba ajurur.

Mpox clade I ya Africa nung kanga bulua menateper aser taküm nisung 18,000 tema dak putetogo aser parnok teimbaka tanurtem lir. Mpox ajanga nisung 600 asüba osang metetdaksüogo.

World Health Organization (WHO)-i taoba ita Mpox ya public health emergency ka aser international concern lir ta sangdongogo.

Mpox clade 1 ya 2022 aser 2023 nung prokshiba mpox clade 2 den tekaraba menateper aser tamajungba lir ta WHO-isa metetdaksüogo.

NPYC-i Bobby Panicker & pa den yaritepertem aitsür

Dimapur, September 8, 2024

(TYO): Taoba Congress züingsem Bobby Panicker-i NPCC lenirtem tenüing menükja aruba aitsür ta Nagaland Pradesh Youth Congress (NPYC)-i metetdaksüogo.

Bobby Panicker ya January 27, 2024 nü party nungi anentsüogo saka pai media ajanga nübertem anisatsü meranger aser iba ajanga pai küm aika Naga nung anema inyaka aruba kuli agütsür ta NPYC-i ashi

Panicker-i pa Nagaland nung Congress aser NECCC founding member ta ashir saka ibaji tiyazü lir. Pai anaben tashi Congress toktsü aser maongka aginüba atema tanaben aden. Panicker-i pai mesaklokba lenirtem dak tai tonglokja arur aser iba jagi AICC tanishirtemia NPCC-i pa party nungi anentsü meyipa agitsü memulunger, ta NPYC-i ashi.

Panicker aser K Therie nati dang tena lenisüba mapang AICC-i NPCC nem elections ateam sen agütsüba meteta lir. Saka iba mapang party tim mesü ketdangsüba den senotsü tim mesü amshiba ajanga Congress candidate ka danga takok mengutet ta parnokisa ashi.

Panicker ya Nagaland-i mezüing IB nung inyaksü aru aser küm ishika lir pai sen aika bendener mapa toktsü. Anungji pai ozü lenirtem anema inyakba anentsü metetdaksür ta NPYC-isa ashi.

"NPYC-i par kiojentem nung lungkak aitsü aser yimjak nung pai tim mesü rongsen bendenba jungkai adoka sayutsü. Külen, Panicker den külemi yaritepertem-a kümdangtsü metetdaksür" ta NPYC Working President Keviphreo K Kuotsu-i sangdong ka nung ashi.

Dimapur, September 8, 2024 (TYO): Global Naga Forum (GNF)-i September 6, 2024 nü Matikhrü nung nisung lokti tepsetba bilemteta sentong ka agiogo.

Iba sentong ya zoom ajanga agi aser St. Michael's Church, Khimiau village nung local Catechist Riejusie Nyusou-i temoatsü meshia sarasademer tenzük.

May, 1960 nung NNC-i Indian army agientsü atema bangzüing renemba atongtsü atema Naga home guards-i Thuda, Phor nung aliba 14th Assam Rifles amak ta Pochury Institute of Literature (PIL), Akho S. Leyri-i ashi.

"Ajisüaka, India sepaitemi bomb aser injang amshia khatepba ajanga Naga army-i amakba anen. Idangji Phor nung tanishir trok Assam Rifles dangi oa yimjung atema jembi saka parnok kanga mejungi

reshikangshiba sülen tepset" ta Leyri-i ashi.

"Naga Army-i amakba atema tayang küpzüka Indian Army nung 16th Punjab Regiment-i September 6, 1960 nü Matikhrü yimtsüing meketbang aser kinungtsü o chirnurtem jakdang teburtem reshikangshi. Iba anogo Matikhrü nung 9 tekolak atang aser parnok mang mi agi rongdok" ta paisa metetdaksü.

Global Naga Forum (GNF)-i iba anogo bilemteta sentong ayongzüka amongba atema pelar aser Naga nung tarutsü ajungdaksütsü asoshi Naga nung ajak longjemtsü ayongzük ta Leyri-isa ashi.

Pochury Students' Union President Jeffrey Leyri-ia iba tatalokba indang tatsüka lemsatep aser Naga lima asoshi taküm bendanga agütsürtem nem tetushi agütsü.

Sentong nungsa iba anogo nung densemer Rev. Zhihuotho

Katiry-i pa kuli lemsatep. Iba mapang pa arishi küm 7 tain liasü.

Rev. Zhihuotho tebu iba anogo nung yiruba sülen asü aser September anogo kasa tia ajuruba kibong aika lir ta pai metetdaksü.

Naga Hoho, Naga Mother's Association, Naga Students' Federation aser Naga People's Movement for Human Rights ajanga osangtem lemsatep aser Naga nung September 6, 1960 anogo nung taküm bendanga agütsürtem bilemteter ta ashi.

Sentong nung mendenji Kilentoli Jamir liasü, GNF Convenor Chuba Ozukum-i nisungtem pelaa agizük Pochury Women Organisation, Kohima-i ken ajanga shilem agi.

Prof. Rosemary Dzuwichu aser Dr. Theyiesinuo Keditsu nati Naga Independence Day August 14 nü Essay competition aser Poem recitation nung takok angurtem tenüing metetdaksü.

PM Modi-i Sep 21 nü Delaware nung Quad Summit nung adentsü

New Delhi, September 8, 2024

(Agencies): Prime Minister Narendra Modi-i tan ita United States semdangtsü aser kümsük tasenben atema pai takok anguba sülen US semdangbaji tang mezüing asütsü.

Modi-i taoba ita ana tsüingda Ukraine aser Russia semdangba sülen US semdangi aotsü.

PM Modi-i September 21 nü Wilmington nung Quad Summit nung adentsü. Wilmington ya Delaware nung US president Joe Biden asoba jila lir.

Iba Quad Summit ya Joe Biden aser Japan Prime Minister Fumio Kishida na atema tatembangba asütsü kechiyong tenaprong mapa nungi anentsü.

QUAD linük pezü tanishirtem rongnung Modi ya tejenpur ka lir aser külen India-i 2025 nung Quad Summit ayonga amongtsü.

Quad alliance tenzük Delaware summit ya küm 20 ajungba mapang ka asütsü.

Delaware nung Quad Summit nung adenba sülen PM Modi New York-i aotsü aser September

22-23 nung United Nations Summit of the Future nung adentsü.

September 22 nü PM Modi-i 'Modi & US' Progress Together' ta ser lokti sentong ka nung jembitsü. Iba sentong ya Long Island nung aliba 16,000-seater Nassau Veterans Memorial Coliseum nung agitsü.

PM Modi-i UN General Assembly nungbo o mejembitsü aser September 28 nü External affairs minister S Jaishankar-i India tenüing nung jembitsü.

Manipur CM-i Unified Command meshir; Kuki nung den SoO agiendaksünür

Imphal, September 8, 2024

(Agencies): Manipur Chief Minister N. Biren Singh den cabinet minister aser MLA temi Deobarnü Governor Lakshman Prasad Acharya den ajurutepa senden ka menogo.

Iba senden nung CM Biren-i Governor nem memorandum ka agütsüba nung Manipur security tebilemsütem atema lenisüba tashi itshtsü aser Constitution nung aliba ama state sorkar nem ketdangtsütsü tashi agütsütsü shia lir.

Iba memorandum nungsa state litsü kümzüka ayutsü atema Kuki telungpur teloktem den Suspension of Operations (SoO) agreement agientsü takhangba agütsür.

Manipur state sorkarisa arrtsü atsüdangtsü, National Registrar of Citizens (NRC) tenzüktsü aser ozüing alema arurtem meyipa yoktsü takhangba agütsüogo.

N Biren Singh-i aniba sorkari Manipur nung security operations ketdangtsüba Unified Command state ket nung agütsütsü meshir.

Anti-drone system amenokgo:

Manipur nung Kuki telungpurtemi drone aser rocket propelled bomb amshia civilians amakba atema sorkari "Dronaam" ta ser advanced anti-drone system ka amenokogo.

Imphal West aser Kangpokpi district tem nung tongtipang tesem kar nung technical drone system amenokogo.

Honibarnü CRPF nung drone handling experts nem "Dronaam" agütsü. Iba ya drone nung grenade enoker Meitei nung amakba noktangtsü atema amenokogo ta Inspector General of Police (Intelligence) K Kabib-i ashi.

Manipur police-isa civilians amakba anema raratsü atema prangpong-injang talila bener arutsü mapa inyakdar ta pai ashi.

Külen, Kuki nung den arrtsütepa aliba Imphal West, Bishnupur, Kakching aser Imphal East district tem nung aonung drone anguba sülen lights shibanger.

Imphal West district kübok Koutruk aser Kadangband nung tawa telungpurtemi drone nung bomb enoker amakba sülen nübertem kümdangshir.

Deobarnep 4:30 ako meta Kuki telungpurtemi Mongbung amak aser idangji village volunteers-i parnok den meyiper khatap ta police-i ashi.

Iba osang angashiba sülen district police den central forces tesem tonga ao aser tanep 7:ako meta tashi Kuki telungpurtem den khatap.

Ano, tanü nikongdang 4.30 ako meta combined security forces aser Kuki telungpurtem tsüingda khatap tenzük aser 5.30 ako tashi khatap saka nisung asüba mesüra yiruba osangbo kecha mali.

Directorate of Education-School, Manipur-i Deobarnü state nung school ajak Mongulbar tashi shibangtsü tetuyuba agütsüogo.

Kuki telungpurtemi drone aser long-distance rocket amshia Meitei yimtsüingtem amakba ajanga school tem shibangtsü lemtet.

Dimapur nung Clean Air pledge nung school 20 nungi shilem agi



Mopung temürek atema tezüngzüktep agitsü asoshi Honibarnü Livingstone Foundation International School, Dimapur nung kaketshir, tesayur aser Dimapur nungi ketdangsürtem adenshia aliba noksa nung angur.

Dimapur, Rongjui/Sept. 08 (TYO): Mopung temürek atema tenangzükbä agitsü asoshi Dimapur nungi kaketshir, tesayur aser ketdangsür tem Honibarnü Livingstone Foundation International School, Dimapur nung adenshia liasü.

Dimapur aser linük mopung menenba nungi kumzüksü atema International day of Clean Air for Blue Skies nüngtem nung national clean air programme indang awareness sentong nung school 20 nungi kaketshir aser tesayurtem, Dimapur district administration aser Dimapur Municipal Council (DMC) ketdangsür temi tenangzükbä agia liasü.

Iba campaign ya Dimapur district administration ajanga Livingstone Foundation Society aser Breeze Women Welfare Association den lungjemer ayongzüka liasü.

Clean air pledge agiba den

külemi iba sentong nung clean air signature campaign, inter-school painting aser science project competition on clean air aser süngtong atemba amala maparen inyaka liasü.

Iba sentong nung tesemdanger tongti ka ama jembidang, taküm International Day of Clean Air for blue Skies indang omen ya "Invest in clean air now" lir, ta DMC Chairman Hukheto Yephthomi-i ashi aser iba mapa inyaksü mapangji tangya lir, ta shia liasü.

"Asenok lungjemer asenoki agiba mopung ya mürekdahtsütsü. Asenok lungjemer ajak atema 'blue skies' lidaktsütsü," ta pai ashi.

Nagaland Pollution Control Board, District administration, Breeze Women Welfare Society aser Livingstone Foundation International amala reju temi mopung temürek angutsü asoshi temelenshi

tajung atema meranga inyakba atema Yephthomi-i tenüngsang agütsü aser mopung temürek atema DMC-ia akokba lenmang nung yariteptsü ta ashi.

Livingstone Foundation Society chairman, Dr Andrew Ahuto Sema-i iba sentong nung jembidang, tarutsü putu asoshi mopung temürek aser tebour tajung libajen yutsütsü asoshi lungjemer inyaksü ayongzüka liasü.

"Alima tatsükba akumba tebilemsü ya tulu ta asenoki angatetsüla," ta pai ashi.

Dimapur aser Kohima nung air quality ya Central Pollution Control Board ajanga lateta yutsüba 'premissible limit' dak tali lir, ta Nagaland Pollution Control Board scientist Yanthan Kithan-ia ashi.

State nung mopung temürek alitsü atema asenoki team ka ama inyaksüla, ta Kithan-isa ashi.

CSU-i kenshi oshi tetoktepba sentong ayongzüük



Dimapur, Rongjui/Sept. 08 (TYO): Chakhesang Students' Union (CSU) ajanga "Promoting Multilingual Education: Literacy for Mutual Understanding and Peace" omen nung ajemdaker September 7, 2024 nü Government Higher Secondary School, Pfutsero nung Literary cum Cultural Competition ayongzüka liasü.

Iba sentong tenzükbä nung tetushi tesemdanger Vezühü Keyho, president, Chakhesang Public Organisation (CPO) ajanga iba ama sentong tajung ayongzükbä atema CSU dang pelaba metetdaksü.

Pai iba mapang pei ayak sayutsü atema sobaliba senmang kota tongtipang ta asüba indang jembi aser nisung ka aintsü atema pei tetsü oshi metetsü ya kanga tongtipang lir ta ashi.

Keyho-i kaketshirtem dang ochishia aser indang-indanga nokdaksü yimya sübatsü

ajungshia liasü. Paise kaketshirtem dang meranga inyakba yimya sübatsü aser takum nung takok alitsü atema Tsüngrem mezüing südaksütsü shia liasü.

CSU tir Pfulo Sara-ia iba sentong nung shilem agiba unit tem dang pelaba lemsatapa liasü.

Iba sentong ya tetoktepba kisüing masü saka tepela aser pei jangraba benjongmung ka lir, koba Chakhesang kin indang sobaliba tajung wazüka ayutsü nükjidong nung ayongzüük, ta pai ashi.

Iba sentong yagi Chakhesang nüburtem atema sempet balala sayutsü sapang agütsür, ta ashi.

CSU ajanga tawa sorkar indang kaket reju 130 semdangba indang osang tongmelang agi agütsü aser ano private school tem semdangtsü sentong lir, ta metetdaksü.

Telungjem, tangatetep aser yimjung tashi amshia shisaliok aser sobaliba senmang wazüka

ayutsü CSU mangdang lir, ta Sara-ia ashi.

Iba sentong nung Naga Students' Federation tir Medovi Rhi, Sub-Divisional Education Officer (SDEO) Pfutsero, P. Lohe, Chakhesang Mothers' Association tir Zhonelu Tunyi den CSU seniors aser tongtipang nisungtem aika dena liasü.

Iba sentong nung CSU indang tribunal general Mutsivoyi Kotso menden liasü aser Kevengo-u Ngotha, Miss Phek 2023 aser Luthono Resuh, 2nd Runner-Up Miss Phek 2022 nungertem onir ama liasü.


CBCC indang Education secretary Teweu Mero-i Tsüngrem temoatsü jazüka sarasadem aser Lower Khomi Students' Union ajanga sobaliba yimya ka nung shilem agia liasü.

Iba sentong nung o intepba, washitepba, quiz, drawing aser photography densema tetoktepba balala liasü.

OM Books



DIMAPUR Christian Book Fair



9 - 21st SEPTEMBER 2024
9:30 AM - 5:30 PM
(Sunday Closed)

2 O.M Books, A.H Road, opp. Dimapur Sumi Baptist Church, Chakhesang colony, Dimapur.
98620 08081



- 1. Every day with Jesus - 299
- 2. Quick Scripture Reference for Counseling - 249
- 3. How to Read the Bible For all its worth - 249
- 4. 101 Bible Lessons - 325
- 5. Fire of Revival - 99
- 6. Peace with God - 225
- 7. Heart of Christian Leadership - 199
- 8. Preparing Expository Sermons - 275
- 9. New Evidence that Demands A Verdict - 949

A collection of 9 Valuable Books

2557, offer Price 1950/-

Assam Rifles temi International Literacy Day ayongzüük



Dimapur, Rongjui/Sept. 08 (TYO): Assam Rifles temi September 8, 2024 nü Little Angels Higher Secondary School, Dimapur nung International Literacy Day ayongzüka liasü.

Nüburtem aser kaketshir nem azüngtsü aser zülutsü kota tongtipang ta asüba angatetdaksütsü nükjidong nung iba sentong ya ayongzüka liasü.

Alima nung nisung ajakibo

shisaliok monguteter ta iba sentong nung angatetdakja liasü.

Iba mapa ya tanen makai inyaker aser tanur ajak nem angazüksü maongka agütsütsü asoshi ajak lungjemer inyaksüla, ta kaketshir nem angatetdaksütsü.

Iba sentong nung kaketshir 46 aser tesayur 7 dena liasü, kong kaketshir aser tesayur temi Assam Rifles dang pelaba lemsatapa liasü.

Upper Agri colony Kohima nung lokti nübütsük ayongzüük



September 7 nü lokti nübütsük sentong ka nung KMC councillor Khrielievi Chiisi aser dangartem külemi tangokba noksa nung angur.

Kohima, Rongjui/Sept. 08 (TYO): Kohima Municipal Council (KMC) ward No- 17 councillor Khrielievi Chiisi-i Honibarnü "Together for clean & sustainable environment" omen nung ajemdaker Upper Agro colony Kohima nung lokti nübütsük sentong ka tenzükbä liasü.

"Tanü lokti nübütsük ya tetenzük dang lir. Taruba mera nung asenoki tebour ajungtsü atema jara nung noksa yanglua painting alitsü," ta KMC

indang deputy chairperson, Chiisi-i ashi.

Asenok tebilemba ya asen colony mürekmejua, mopung temürek aser libajen müreka ayutsü lir, anungji colony panchayat, lanur aser colony nung alir temi yaritsü ayongzüker, ta pai ashi.

Ano maneni lokti nübütsük ya Agri Farm, Electrical, Mewibogie aser Forest Colony tem nunga noklem lemsar ayongzüka aotsü.

Jammu & Kashmir assembly election atema BJP-i candidate 10 sangdong



Ramban, September 08, 2024: Union Defence Minister aser BJP lenir, Rajnath Singh J&K Assembly elections atema nüboyim sentong ka nung adentsü atema arudang tangokba noksa nung angur.

Srinagar, September 08 (Agencies): Jammu & Kashmir assembly elections atema Amongnü Bharatiya Janata Party (BJP)-i 'list' trokbuba nung candidate 10 tenüng sangdongogo.

BJP nungi RS Pathania-i Udhampur East Assembly menden nung tokteptsü aser Naseer Ahmad Lone-i Bandipora menden nung tokteptsü.

Mohd Irnees Karnahi-i Karnah menden nungi tokteptsü, Ghulam Mohammad Mir-i Handwara menden nungi, Abdul Rashid Khan-i Sonawari nungi,

Naseer Ahmad Lone-i Bandipora nungi, Faqir Mohammad Khan-i Gurez (ST) nungi tokteptsü aser RS Pathania-i Udhampur East menden nungi tokteptsü.

Union Territory of Jammu & Kashmir nung Congress aser National Conference (NC) party nati lokteper menden lemer tokteptsü.

Jammu & Kashmir nung September 18, September 25 aser October 1 anogotem nung election agitsü aser October 8 nü vote azüngtsü.

National Conference aser People's Democratic Party nati peipei party manifesto nung

J&K nung Arrla 370 tanaben bener arutsü nangzüka lir. Ano BJP-ibo Arrla 370 ya akhi otsü ka kümogo aser tanaben lepa abener marutsü, ta metetdaksüogo.

2019 küm August ita nung J&K nung Arrla 370 agienba sülen tang mezüng J&K Union Territory nung assembly election agitsü.

Honibarnü BJP lenir tain aser Union Home Minister, Amit Shah-i Jammu nung party manifesto sayatsüba mapang nung Congress aser National Conference na indang election manifesto sashia aitsüogo.

India NSA, Ajit Doval-i Russia yimtiba Moscow semdangtsü

New Delhi, September 08 (Agencies): Taruba hopta Russia yimtiba, BRICS NSA senden nung India National Security Advisor (NSA), Ajit Doval aser China NSA, Wang Yi naprongla adentsü; BRICS senden nungji tang Ukraine nung rara atema-a jembitsüa akok.

NSA, Doval-i Russia semdangtsü aliba atema tang tashi nungbo official sangdongbo agüja mali, ajisüaka taküm July ita nung Ato kilonser Narendra Modi-i Russia Tir, Vladimir Putin ajuruba aser August ita nung Ukraine Tir, Volodymyr Zelensky ajuruba mapang nung pai lenir anaprongla den tebilemba karbo lemsatepogo.

July 9 nü Russia Tir Vladimir Putin ajuruba mapang nung Modi-i pa dang, yimjungji tongbang raraba tesem nungi mangutsü ta ashi.

Paisa Ukraine rara nung tai maket nübur aika, talisa tanurtem asüba atema aitsüogo.

Modi-i Russia aser Ukraine naprongla semdangba mapang nung pa den NSA, Doval-a liasü, anungji Ukraine nung rara anentsü atema jembiba onük ajakji Doval-ia meteta dang lir.

Osang angazükba agi, August ita nung Modi-i Ukraine semdangba nükjidongji India-i anüolen aliba linüktem den tesendaktep tajung ayutsü nükjidong nung semdanga liasü.

Ukraine Tir Zelensky-ibo

2021 küm Glasgow nung Climate Change senden alidang Modi dang par linük semdangtsü jaoka liasü. Ajisüaka Russia-i Ukraine anema rara ayongzüka rara tenzüka ajanga Modi-i iba linük mapang talangka mesemdangteti liasü.

Taruba hopta Ajit Doval-i BRICS senden nung China aser Brazil na densema züngsem linüktem nungi NSA tem ajurutsü. Iba senden nungji Ukraine nung rara anentsü atema jembitsüa akok.

Russia Tir Putin-i India dang yimjung alitsü atema tongti shilem agitsü ayongzükogo, kechiyong Russia aser Ukraine naprongla den India tesendaktep junga lir.

Yipru mopung tesashi agi AP densema state aika kongshitsüa akok

New Delhi, Rongjui/September 08 (Agencies): Tawa India tesem aika nung tzünglu maneni aruba ajanga tzümetsüng lendong ajangshidar, talisa Andhra Pradesh, Telangana, Rajasthan aser Gujarat state tem nung tzünglu maneni aruba ajanga tzümetsüng lendong ajangshia nisung aika süogo aser kiojen-a jenti raksago.

Tang tesüsa India Meteorological Department (IMD)-i Coastal Andhra Pradesh aser Yanam nung tzünglu kanga arutsü, ta sangdongogo.

Iba dak alia Bay of Bengal nung cyclone yipru tesashi ka tentetdar, aser ibaji ajanga Andhra Pradesh densema state aika kongshitsüa akok.

"Tanep (September 8) 8:30 ako nung central Bay of Bengal aser temeket nung low pressure area liasü. Ibaji north tsütsüleni aotsü aser North Odisha-West Bengal tzüyimkümlen Bay of Bengal nung yipru tesashi akümtsü. Iba sülen taruba anogo asemnü tsüngda Gangetic West

Bengal, north Odisha, Jharkhand aser north Chhattisgarh leni aotsü," ta IMD-i metetdaksü.

Cyclonic yipru ajanga Coastal Andhra Pradesh aser Yanam nung tzünglu kanga sashia arutsü.

Talisa AP kübok Vijayawada nungbo Budameru ayong nung tzü kanga mobanga yimdar.

AP nung nisung 46,320 shi relief camp 226 nung jenoka lir aser National Disaster Response Force (NDRF) den State Disaster Response Force (SDRF)-i kümzükba maparen aser teyari agütsüba maparen maneni inyakdar.

Tzümetsüng ajanga Telangana nunga nisung 29 süogo.

Agricultural minister Shivraj Singh Chouhan-i Andhra Pradesh aser Telangana na nung tzümetsüng agi kongshiba tesemtem semdangba sülen Centre sorkari teyari agütsütsü, ta metetdaksüogo.

Tang atema state ana nem sen crore 3,448 agütsütsü, ta minister-i sangdongogo.



September 08, 2024 nü Buxar nung Tudiganj station anasa Magadh Express train lendong ajuruba sülen tangokba noksa nung angur.

Lucknow nung ki chirepba bushisüng-dangtsü atema luden ka tentetogo

Lucknow, September 08 (Agencies): Uttar Pradesh yimtiba, Lucknow nung ki ka chirepba tatalokba bushisüngdangtsü atema state sorkari züngsem aseme akümba committee ka tentetogo.

Uttar Pradesh Home Department nung secretary, Dr Sanjeev Gupta iba committee nungji mendenbuba asütsü aser committee jagi ki chirepba kuliji tejangja bushisüngdangba sülen tekeraba nung report renema sorkar nem agütsütsü.

Iba ki chirepba lendong nung asürtem nisung 8 jungogo aser maneni kümzükba maparen inyakdar. Honibar nikongdang kasa lendong nungjisa nisung 28 yirua liasü.

Amongnü Uttar Pradesh Chief Minister Yogi Adityanath-i hospital semdanga iba lendong nung yirurtem ajurua jembio. Ato kilonser Narendra Modi-ia mangyim jashi lemsatepba den külemi iba lendong nung asür kinüngertem shia nem sen lakh anana aser yirua alir shia nem sen meyirjang tenemnem (50,000) teyari agütsütsü, ta sangdongogo.

Lucknow kübok Transport

Nagar area nung asemben amentepa asüba Harmilap Building ji pharmaceutical business inyakba ki ka liasü.

Tzünglu kanga aruba sülen Honibar nikongdang 5:00 ako meta kiji chirep.

Transport Nagar Chowki in-charge, MK Singh-i ken o agütsüba nung ajemdaker ki kibur, Rakesh Singhal anema FIR ka benokogo.

Amongnü anepdang 3:00 ako tashi nung ki chirepba jana nungjagi tasümgang 8 agitetogo.

Joint Commissioner of Police, Amit Verma-i, ki chirepba jana nungji joko tasümgang malitsüa akok, ajisüaka maneni bushidar, ta metetdaksü.

National Disaster Response Force (NDRF) aser State Disaster Response Force (SDRF) sepaitemi iba lendong nungjagi nisung 28 bo kümzük aser iba lendong nung yirur teimbaka Lok Bandhu Hospital-i anir ao.

Iba ki ya küm pezü tejaklen ang asüba liasü aser Honibarnü iba ki chirepba mapang nungji ki tsünglanglen kisüba mapa teinyakdak liasü.



September 08, 2024 nü Ahmedabad nung World Suicide Prevention Day anogomong nung telok ka nung züngsemtemi soseta asüba dak sendakba awareness campaign agidang tangokba noksa nung angur.



TIR YIMYIM YIMOBILEM (EDITORIAL)

DIMAPUR TENTONÜ, SEPTEMBER (RONGJUI) 09, 2024

Asenok ajak asoshi takok

Tetsüng külen bomb agi poktoker mali, tasü nungi kümzükba nisung Hokato Hotozhe Sema-iyakanü France yimtiba Paris nung alima ajunga nungi temang shilem nung matamabensartem adenshia asaya tapu balala asayaba Paralympics 2024 asayamong nung long onshishiba, Shot put nung tasembuba takok jenjang anguba takokji pa kisüng takok masü asenok ajak asoshi alima tsüngdang Naga nunger ajung metetdaksüba takok tajung tuluka asütsü. Paralympics ojang ya mezüng ojang 'Para' ta asübaji Greek oshi nung "Para" tetezü külemi atongtepa aser tanabuba ojang 'lympics' ta asübaji 'Olympic' ta asüba nungi agiteta atongtepa ojang ka lir. Tetezüji, tesem koba nung südirsüaka kodangsa Olympic Games ayongzüka kadir, iba Olympic asayamongji temli atongtepa iba "Paralympics" asayamong ya akar. Aji oda, taküm 2024 kuma Paris nung Olympic asayamong temli iba Paralympics 2024 asayamong ya August 28 nungi tenzükba yashi September 08 nung tembangogo. Ashiko, asenok aika asoshi Olympic asayamong metetba dak alaka Paralympics asayamong indang yabo tangang meteter asütsüa akok. Aji oda, asenokia Paralympics asayamong tajungba aser tejangjaba nung metettsüsa taküm Paris Paralympics 2024 nung Naga nunger nokinketer Wabong Hokato-i long onshishiba nung takok tajung ngutetbaji Naga nunger ajak asoshi tang aser teti atema tajungshi aser tayongzükba o jembidak aser takok atema tashi tasen angudak tesem asütsü. Pa ya arishi küm 17 asüdag Indian army nung shimok saka tia majung mapai ili Jammu & Kashmir nung kiralongrartem mita jajadang 2002 küm ali nung rema yutsüba bomb agi pa tetsüng külen poktok saka takumbo kümzük. Atangji, sepai ka tetsüng külen mali kechi sütsü ta bilem saka pa atemabo tetsüng külen poktokbaji Tsüngremer sentong balaka liasü. Pa tetsüng külen meliaka pa asoajen ajungba agi, par sepai tanishirtemi pa dang saisapong nung temulung agütsütsü ajungshi aser paia iba o tajungji agizüka long onshishiba nung tokteptsü renem tenzük. Asenoki memetet dang ashi, pai 2022 küm-a Morocco Grnd Prix nungbo tanabuba takok jenjang angu aser iba sülen Hangzhou nung Asian Para Games asayamong nung takok jenjang tasembuba ngua lir. Aji oda, taküm 2024 kumsa World Championship asayamong nunga pa takok jenjang pezübuba nungbo liasü. Asenok ajak temoatsü angutsüsa Hokato-i pai pa takok anguba tenüngsangji pa temeim kinungtsü nem agütsübaji asütsü. Par kibong nung ita sen agi nüngdak meperi, aji oda aiben kinungtsüi la-ang mechii aser mejemi la kinungbo temang tashi itta alitsüsa anepalu. Aji oda, aiben paibo tezüdang long onshishiba asayaji toktsünü saka kinungtsüi ajungshiba ajanga pai asayaji metoktsüi merangba agi tanü alimai ajaki tushitsüsa aser tenüng tajung den külemi rongsen nunga takar akümtsüsa takok tulu nguogo. Aji oda, iba ama tetsüng ka maket tasü nungi jentetba Naga nunger kati alima asayamong ka nung takok bener arutetba tepela tamaitü, Nagaland government-ia pa nem senpet sen crore ka ser lakh tenem agütsütsü sangdongbaji amata senpet ka masü, aji pai anguba takok dak alang agütsüba senpet ka asütsü. Iba denji ano Nagaland Chief minister-i center government dang pa mapa nung tekaba jenjangi tudaktsütsü ashitsü aser pa nem Arjuna Ward konang agütsütsü asoshia asüngdangtsü ta metetdaksübaji Hokato atema dang masü saka asenok ajak asoshi osang tajung ka lir. Iba denji ano Nagaland nunga Hokato nüngtem nung saisapong nung lanurtem ajungshia sentong balala tenzüktsü Chief ministeri metetdaksübaji yakta mapa kuma aoba angutsü imlaa atar. Naga nunger aika dak saisapong tapu balala nung asayatsü sempet tajung keta lir, anungji asaya nung janrar aser tajunga junga asayar. Ajisüaka, tangar den toktepa sayitettsüsa asenok government-i anepalu mesütetter aser asaya nung temulung tali agütsütsüsa takok angurtem tushia senpet aser mapa agütsüba kangabo mangashir. Iba ama mapang ka nung, Hokato-i anguba takok aser senpetji ajak atema tayongzükba tuluka asütsü.

OLEMSABANG

ALIMA TEJAKLENI AOBA DEN AROGO INYAKYIMA MELENSHIA AOR

~ L. Kika Pongener.

(Yashi adok nungi...)

Sürabangla, nüburtemi shirnok dak-ang tamang kaatettsü...??? Tanü Khristar arogo aika dak nuburtemi tamang makatettsüsa, arogo jakla/noksa (Image) raksaba/menena-adokba ya, tanaben meyipa yanglushitsü asaktsü sudi ta kanga sasa-a bilemer. Tanü lim arogotem nung tenla sen lakh/crore aika arur, aser sen aika arur ta ser...Kangarabo menungdakba 'Project' tapu-tapu apiteta/shisateta, sen lakh/crore aika endoka yangluteper. Aji oda, yimden, loktiliba nunga suang, aser arogo nunga suang...Kodang rongsen nungdakba dang nungi talila lidir, idangji aibelentsüsa lenmang sadem-sadema lapoktsür....Aser yimden, loktiliba lennir aser arogo tenzükera aika mojing tatidang mepaitokteti rongsen/sen nung metsüdaker alanger.

Tanü lim arogo tulu aika nung ita shia tenla sen lakh/crore aika arur...Anungji arogopurtem dang tenla talila mesaruyongjia, terenlok mapa inyaktettsü, mission mapa-a küsa dang inyaktettsü aser arogo taküm alitsüsa, tajangzük meyipa angutsüba mapa (Project) karbo inyaktsüla. Anungji kangara nungdak makaba 'Project' nungpo arogo sen laloshiponga meintoktsüla. Jokorla, arogopurtem dang tenla tapu-tapu saruba ya terabo anentsü lenmang bushitsüla. Arogotem nung Deobar teimba ka 'Envelope' saru saruba ya terabo tajemba akümtsü lenmang bushitsüla. Kechiyong arogotem nung tenla saru onsaraba yagi arogopur karbo tamangang mamangshili ta kuma odagi. Tanü anuolen (Western) limatem nunga arogo aika saru-saji zünraba agi tamanger ajema akümba osang osangkaket nung azünger. Aji oda, arogo rongsen ketdangsuba mapa nung, nuburtemi tamang makatettsüsa, temulong malemtsüsa, tashishitsü, tajitettsü keta, ochimashi ketdangsuba amshitepra, ashiko, arogopurtemi tenla agütsütsü atsü-ayungtsü, aser arogotem nung tenla agütsür ajema akümtsü aser tekülem sentepi arur aika mali, tenlaki azüng-azünga kuma aotsü sudi ta nuklai arur. Ano tanü town tulutem nung...Aor arogotem nung arogopur aika taginuba ola adokbaji...Fellowship shia ya 'Independent' arogo kuma razüka onuba taginuba aser tejangraba ola adokba angazüker...Anungji takoktsü lenmang dang lira, nubur taginuba aser tejangraba olaji anga-a, razüka yoknungang kanga agi tajungba asütsü sudi ta nubur aikati shisadanger.

Temeim Aor Khristan tajungtem...Asenoki alima dang kechi lesson sayur...??? Tanü Aor lim arogotem nung nubur ajunga asükshijang meronga aoksatsüsa kechi mapasa ataloker...??? Tamalena tenla sen saruba molok nung amuoka sen agitetba otsüa angazük....Ano tanüa arogotem nung sen lakh/crore menden tashi samaba osang angazüker...!!! Aji oda, aibelenali ali asü mali (?) ajibo teinyakeri dang metet....Saka iba ama tansutsü tatalokba otsü/osang yagi...Aotsür Aor tangar kintem dang kanga numa-medangteti kümogo. Tanü 'Social Media' sabang yagi, kinuk-kisang nung atalokba ajak second-minute tsüngda nung alima ajunga sunga-adoker. Asen tsürabur-bo, tongmelang tamang sur ochishia amanga aruji...Deobar-nu tzümalen shishia senzüba, Bodhbar/Honibar aonung alu nung ayipba metetra tatok nangzükdaksüba otsü lir. Parnokbo rongsen ketdangsuba nung aibelentsübajibo kecha otsü mali asü. Ajisuaka, tanübo kecha tarendak/tetsübo mali, Khristar arogo rongsen nuburtemi tamang makatettsüsa amshiba angazükdang nubur aika kanga aoksar...!!!

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Reshikangshiba Khristantem pusema kibong anati Ben Nevis tenemi atu



Do Rozario aser Pampackal kibong na nungi züngsemtem Ben Nevis tenem kolak nung tangokba noksa nung angur.

September 08, 2024: Alima tesem balala nung reshikangshiba Khristantem pusema tan hopta kibong anati UK nung tenem talangtiba Ben Nevis-i atu.

Kibong ana jagi Khristan charity telok Aid to the Church in Need (ACN) nem senotsü bendentsütsü nükjidong nung kibong ana jagi tanurtem-a anisemer tenem kolak jagi atu.

Do Rozario aser Pampackal kibong na nungi züngsem 8 tenem jagi atu; parnok rongnung tanubosangji arrshi küm 7 tanur liasü.

Parnoki feet 4,413 tenem kolaki atuba ajanga tang tashi nung parnoki pound sen 1,800 sarutetogo.

Iba sentong ayongzüker, Aloma Pampackal-i, tenemlenji kanga temekong süaka kibong anati iba tayongzükbaji atemzuka liasü, ta metetdaksü.

Aloma kinüngtsü Pampackal-i, “Khenkhenbo onok menütepa liasü saka tali mekongba, tzünglu aruba aser mopung ajanga khenkhenbo onok temelung ajema arendaka liasü. Itemji ajakji ajanga onok tendangogo,” ta metetdaksü.

ACN den jembidang kibong ana nungjagi züngsemtemi, parnoki tenem kolaki atubaji nüngdakbapur Khristantem yaritsü nükjidong nung liasü, ibayongji parnoki tenem kolaki atutsüsa tashi balaka angu, ta metetdaksü.

Pampackal-i, “Anepdang 8:30 ako nung tenemi atutsü atema jaja tenzükbajibo melamelar liasü aser onok tsüngda kati ka ajungmesotepba ajanga onok dak tejangraba tulu liasü. Ajisüaka kobi melii tsüngsang-mopung melenshi tenzü,” ta metetdaksü.

“Onoki mepet-tzüsü temelem ajangshiba ajanga metre ishika dang tenük agi nguteta liasü, temperature 3°C tashi ajema alu aser ghonda ka nung mopung temekongji mile 56 tashi ona liasü,” ta laisa metetdaksü.

“Iba dak alia kobi melii tzünglu aru, aser ibaji ajanga tenemi atutsüji ano kanga tasakba aküm,” ta lai ashi.

Pampackal-i, “Onok ghonda aika tenemi atuba sülen onoki tesüsa tenem kolakji atong. Iba mapang nungji onoki anisüngzük angu aser nüma tanga bilem. Ajisüaka kanga mekongba aser tzüsü ajanga onoki tenem kolak nungji mapang talangkabo mekazütet,” ta metetdaksü.

“Tenem kolak nungi alutsüji-a tasak liasü, kechiyong tzünglu aser mopung temekong agi onok mejungi kongshi. Ajisüaka onoki alizüng tongtetba ajanga onok kanga pelaa liasü,” ta lai ashi.

“Onoki tenem kolak nungi ali atongtsü atema ghonda 9 agia liasü. Onok kanga anibelem saka onok nüma tangteta liasü, kechiyong onoki Ben Nevis tenemi tutetba dang masü saka onoki tetezü aketba alizüng ka tongteta liasü,” ta laisa shisem.

Pampackal-i, “Nigeria aser India nung tensa osang angashiba ajanga onok melung kanga kongshia liasü. Ibayongji charity telok ACN yaritsü atema onoki iba ya atemzuka inyak,” ta metetdaksü.

Tang alima tesem balala nung Khristan million 365 dak temabo reshikangshi jenjang nung lir. Yamaji ACN densema Khristan melungtet telok aikati reshikangshiba Arogo aser Khristantem yaritsü atema maparen balala inyaker. Talisa Nigeria, North Korea, India aser China ama linüktem nung Khristantem reshikangshiba jenjang tamajungba dang akümer.

United Kingdom nung amenoka aliba Khristan organization Release International (RI)-ia linük 25 nung reshikangshi tia ajuruba kibongtem nem teyari agütsür aser mapang shia alima tesem balala nung Khristantem reshikangshiba report agütsür.

Nigeria nung Khristantem anema inyakba tamajungba dang akümer aser tesüiba küm ishika tsüngda iba linük nung Islamic kiralongrartem aser Islam yimsü alia amanger telok balalai Khristan meyrirjang aika tepsetogo. Nigeria nung Boko

Haram aser Islamic State West Africa ama kiralongrar teloktemi maneni ketdangsertem tetuyuba tashi mangar aser Fulani kiralongrartem Khristan yimsüngtem maneni amaker.

Ano China nunga Tir, Xi Jinping-i aniba Communist Party-i Evangelical Khristantem anema maneni inyaker aser sorkari melaba Arogo nung register masüba underground Arogotem anema inyaker.

India nung nüsüng shilem 2.3 dang Khristantem lir aser nüsüng shilem 80 dak temabo Hindu nung lir. India nung state 10 dak tema nung anti-conversion ozüngtem benoka lir aser item ozüng nung ajemdaker Khristantem nem tai tonglokja apur.

ANO GO ABEN TSÜNGREM DEN

Nenok Metsü

Nenok alima metsü, saka metsü dak tanang samadokra, kechi agi aji nüngdaksütsü? Joko aji kecha sütsü masü, saka endoker nisung tetsüng agi ajemshitsüba lir. Mathi 5:13.

Tsüngremer nüburtemji alima wazüka ayurtem telok lir. Alima temenen agi raksaja aliba yanglushitsü aser kümzuka ayutsü asoshi Tsüngremi Khristantemji aja. Ne takümüji lokti nung teraksa aliba endoktsü aser kechi shidak aser tajung lir aji wazüka ayutsü asoshi yok. Tanü lokti nung temeshi nisung ka alibaji kanga tongtipang lir. Ne dak Khrista aliba jagi tangar asoshi Khrista akaba ajak parnok nem kadaktsür. Pa tekümtet angati, teraksa kibong yanglushir, mejungi aliba anebtsür, lemanng tezü nung alir agizüker aser temulung nung jashi alir süneptsür. Item ajakji na ajang ana meketa alir ajak dang Khristai Pa taküm sayur.

Saka asenok asen Kibuba den tesendaktep shidak melira Yisui ashi metsü dak tanang samadokba ama asenok alitsü, tagidak maka akümtsü. Tsüngrem taochi aser ain na ajanga tangar nem magütsütettsü. Asenoki asen taküm nung metsü tanangji koda tendangtsü? Asen kibong repringang. Asenoki ibaji tamajung nungi wazüka yudar ma? Asenok mapa inyakdak tentangang. Asenok aliba ajanga tamajung teraksa sottar ama? Asenok lokti repringang. Asenok atenba ajanga ibai tajungba kümdar ma? Asen arogo koda? Tsüngremi asenok amshiba ajanga tanelaren tajungba kümdar ma? Parnok tanelaren teraksa küma ora asenoki Kibuba dangi or parnok asoshi asen taküm amshiang ta asüngdangtsü akok.

Tripura nung Arogotem longjemer tzümetsüng agi kongshirtem yari



September 08, 2024: Northeast India nung aliba state, Tripura nung tzümetsüng lendong aser anentsüh lendong nung nisung 31 süogo aser nisung 34,100 shi relief camps nung jenoka lir.

Tzümetsüng agi kongshirtem rongnung Khristantema aika densema lir.

State nung tzümetsüng lendong ajuruba sülen Arogo tentet aser Khristan melungtet telok aikati tzümetsüng agi kongshirtem yariba den külemi civil administration den-a

amalitepa inyakdar.

Iba lendong mapang nung Baptist Church Fellowship-i rongdak senden ka ayongzuka Arogoi tzümetsüng agi kongshirtem yaritsü telemtetba agia liasü.

Believers Eastern Church-ia tzümetsüng agi kongshirtem yaritsü telemtetba agiba sülen Arogo 68 nungi Arogo 51-i tzümetsüng agi kongshirtem nem teyari agütsür.

State Chief Minister, Manik Saha-ia tzümetsüng agi kongshirtem nem ano sen crore

10 tali agütsütsü sangdongogo. CM-isa Centre sorkar dang National Disaster Response Force (NDRF) sepaitem tali yoksemang, ta mepishi.

Tzümetsüng agi kongshirtem yaritsü atema Arogo tentettem densema organization aikati Chief Minister’s Relief Fund nem tenla agütsüdar.

Tzümetsüng agi sen crore 15,000 shi jenjang takoksa nguogo aser state nung ayong tulu aika nung tzü mobanga yimdar.

AO OSHI ANGAZÜKDAK: TANÜ ANGAZÜKTSÜBA OJANG



Tammang

(adj) tesangwa mali, aonung ama (darkness)

* Yashi alima ajunga mepet agi tammang kumdaktsü.

Tamshi

(v) tedangshi, tekongshi ta ashiba (do not use)

* Tanurtemi tamshi ta ashiba osettemang amshiner.

OLONG PAITEP # 6918

	1			2	3				
4			5						6
					7				
	8								
	9		10				11		
					12			13	
14									
					15				

TIPIEN

- 2. Süjeplok - (4)
- 4. O agi merenshi - (5)
- 7. Ayongküm li - (5)
- 8. Chiyungtsü mapang süiadok - (4)
- 9. Tsüngrem den jembiba - (9)
- 12. Saklok - (4)
- 14. Samaba mebushitet - (5)
- 15. Mejanga onü - (5)
- 16. Tzü shiruru ka - (4)

LANGTSÜNGLEN

- 1. _____ i - (4)
- 3. Kasa masü - (6)
- 5. Nüchi masü - (5)
- 6. Tashi endok - (5)
- 9. Langtem - (5)
- 10. Anü malidang - (6)
- 11. _____ kibur - (5)
- 13. Tebur tembar tsüngda jatepba - (4)

OLONG PAITEP # 6917 TELANGZÜBA

TIPIEN :

- 1. Semtu, 3. Lepko, 5. Bilem,
- 8. Ulu, 10. Tsüngpang,
- 11. Tesangwa, 13. Aoksa,
- 15. Putir, 16. Yipru.

LANGTSÜNGLEN :

- 1. Sayu, 2. Teb, 4. Kimong,
- 6. Lungkak, 7. Milak,
- 9. Zünga, 10. Temopu,
- 12. Walu, 14. Ali.

NAI-A YA METETTER MA



India nung arishi küm 23 tain kaketshir Tapala Nadamuni-i "world's smallest vacuum cleaner" maneni yangluteta Guinness World Records nguogo. 2020 nung Nadamuni-i vacuum cleaner tasazük 1.76 cm yangluteta otsü tasen yanglu saka 2022 nung tangar kati iba otsüji ajateta liasü. Iba sülen pai maneni ballpoint pen ka nungi 0.65 cm (0.25 inches) vacuum cleaner yanglutetba ajanga maneni "world's smallest vacuum cleaner" naroküm ngutetogo.

Ripun Bora-i TMC toktsür tanaben Congress nung denogo

Guwahati, September 8, 2024 (Agencies): Assam Trinamool Congress toktsüba sülen Ripun Bora-i tanaben Congress nung züngsem kümogo.

Deobarnü Charaideo nung sentong ka agidang Ripun Bora den taoba TMC züngsemtemi Congress nung aden.

AICC General Secretary Jitendra Singh den Assam Pradesh Congress Committee (APCC) president Bhupen Borah aser Rajya Sabha MP Gaurav Gogoi nungeri Bora pelaa agizük.

Bora-i 2016 nungi 2021 tashi



APCC president inyaka liasü. Ajiüsüka 2022 nung pai TMC nung aden aser state president inyaksü shim.

Pai August 2024 tashi TMC state president inyaka aru saka

September 1, 2024 nü TMC lennirtem aser züngsemtem den külemi party toktsü.

Bora-i TMC National Secretary Abhishek Banerjee dangi pai party toktsüba shidi zülu.

TMC ya West Bengal indang regional party ka ama züngshir aser iba jagi pai party toktsür ta Bora-i ashi.

Assam nung BJP melenzüksü atema pai TMC party anitsü merang saka Abhishek Banerjee aser TMC tanishir Mamata Banerjee na den ajuruteptsü maongka mangu ta paisa ashi.

Drone amshia amakba kibong nem Rs 10 lakh agütsür

Imphal, September 8, 2024 (Agencies): Koutruk nung Kuki telungpurtemi tepsetba Ngangbam (O) Surbala Devi atema tentetba Joint Action Committee (JAC)-i Deobarnü Manipur Chief Minister N Biren Singh den ajurutep.

JAC-i la atema temeten meshi aser sorkari teyari agütsüsü asüngdang.

Chief Minister N Biren Singh-i aria bilemba sayua tasür kibong nem Rs 10 lakh agütsüsü nangzük.

Senagi nisung takümka samaba melentsü makok saka sorkari iba

ama mapangtasür kibong den külemi noktaksü teblemstü khuret lir, ta CM Biren-i ashi.

"Sorkar tenüing nung ni Ngangbam (O) Surbala Devi'er kibong den mangyim lemsateper. Iba ama takoksa tulu anguba mapang asenoki akokba tashi lar kibong den yariteptsüla" ta pai ashi.

Deobarnü Chief Minister N Biren Singh den cabinet minister aser MLA temi Governor Lakshman Prasad Acharya den tongtipang senden ka menogo.

Tanep Raj Bhawan nung 11 ako nungi tenzüka minute 45

tashi senden amen aser idangji Manipur nung security tensa atema mapa inyaksü jembitep.

CM Biren Singh-i Governor dang Unified Command Authority ka melatsü atema shidi ka agütsü. Iba ajanga security forces tiptema len anitsü ta pai ashi.

Governor den senden amenba sülen Chief Minister den par telok CM's Secretariat-i oa ano senden ka amen.

Chief Minister-i state nung yimjung aser tensa süngjemstü atema lemtet takang ka aginür ta osang angazüker.

Assam police-i Bangladeshi nunger 5 pur meyipa yok

Guwahati, September 8, 2024 (Agencies): Assam police-i Deobarnü tetsür ana dena Bangladeshi nunger 5 apu aser parnok dang asüngdangya asüba sülen Bangladesh-i meyipa yokogo.

Bangladeshi nunger nisung pungu ya ozüing alema India-i aruba liasü. Assam police-i kanga junga anükba ajanga Mastabis Rahman, Asma Bibi, Abani Saddar, Lima Saddar aser

Sumaya Akhtar nunger apu. Tanü nikongdang 1:00 ako meta parnok ajak Bangladesh-i meyipa yokogo.

Tawa Assam, Tripura, Meghalaya aser Mizoram state tem nung Bangladeshi nunger ozüing alema kanga arur.

September 7, 2024 anepdang Tripura police-ia Kumarghat ajanga aruba Bangladeshi nunger pezü apu. Parnok ya Mohammad

Hanif (50), Mohammad Yusuf Ali (35), Parul Begum aser Jasmine Akhtar nunger ta jangjaogo aser parnok ajak ya Bangladesh kübok Bagerhat district nung alir.

Par pezü ya three-wheelers ajanga Dharmanagar-i aru aser idakji police-i apu. Dhaka nung alir India nunger Rubel ta ser nisung kati parnok nem Bengaluru nung mapa agütsüsü ta mesüzük ta parnoki police dang ashi.

Bryan Adams-i Shillong nung kenten sentong agitsü



Shillong, September 8, 2024 (Agencies): Canada nunger singer-songwriter & musician Bryan Adams-i taküm December ita Shillong nung shilem agitsü ta Meghalaya Chief Minister Conrad K Sangma-i metetdaksü.

"Medemertem Bryan Adams India nung rock capital Shillong-i December 10 nü arutsü aser JN Stadium nung shilem agitsü" ta CM Conrad-i ashi.

Meghalaya nungeri music kanga meimer aser Bryan

Adam kenten sentong ya asenoki music meimba kuli ka lir ta pai ashi.

Bryan Adams-i Meghalaya nung tang mezüing atema shilem agitsü. JN Stadium nung aliba Polo Grounds nung nisung 30,000 den teimba asemer.

Vietnam nung Yagi yipru ajanga nisung 14 asü, 176 yiru

Hanoi, Rongjui/Sept. 08 (Agencies): Typhoon Yagi ajanga Vietnam north tsütsü kongshiba sülen nisung 14 süogo aser 176 yiru, ta state media ajanga Deobarnü ashi aser ketdangsür temi tzunglu kanga sashia arutsü tekum dangtsü metetdaksü. Yagi ya tesüiba küm ter tsungta region nung kongshiba typhoon tem rongnung tesashitaba ta Vietnam ketdangsür temi ashir, aser iba yipru yagi Vietnam north tsütsü nisung million asem dak tema electricity raksatsür lir. Iba yipru yagi tsük aser süngjanglijang adokdaksüba ali 116,192 hectares jungnüa raksatsü. Airport pezü shibangba sülen tayimtsü noklang aika thiogo. Iba typhoon ya Vietnam north tsütsü tzükum nung aliba

Quang Ninh aser Haiphong province tem nung ghonda ka nung kilometre 149 tashi aonba mopung dener Honibar nikon dang tonga aru. Iba yipru ya ghonda 15 shi aiter Deobarnep tashi ajema tropical depression akum. Vietnam indang meteorological department-i linük north aser central province tem nung tzunglu kanga sashia arutsü takzüa lir aser lenden nung tzümetsung adoktsü, ayong anasa ajungben tzümetsung adoktsü aser tenem nung alinen alutsü tekum dangtsü shia lir. Municipal workers den army aser police temi linük yimtiba Hanoi nung tera makepa laor aliba süngdong, billboards laor aliba, electricity poles khudanger aliba aser kilem shizüka bener orr aliba müreka liasü.

Yagi ya Bodhbarnü northwestern Philippines nung South China Sea leni aodang yipru ka ama liasü, koba ajanga iba linük nung alinen aser tzümetsung ajanga nisung 20 asü aser 26 samar bushiptar. Iba sülen yipru ya China-ia yangjia nisung asem takum samatsü aser nisung noklang ka jungnüa yirutsür Vietnam atong. Tzungsang mopung melenba ajanga Typhoon Yagi amala yipru ya tashi taitba kumdaksür, kechiaser tzüym nung tzü talemba akumba ajanga yipru nem tashi tali agütsür, mopung teküraba kumdaksür aser tzunglu tesashiba arur, ta Earth Observatory of Singapore nung director Benjamin Horton-i ashi.

MULUNGNEN TEPELA O



Kangtsüngtsür Telongjem Tuli ajanga, züngsem tajung ka **Wt.MOAMENLA**, Govt. Primary School Tuli 'F' nung tesayur ; nübor lokti asoshi nendak-nendaka bendanga agüja inyakba tejangja meteta, Mokokchung District Teachers' Award Sept. 5, 2024 anogo nung ngutetogo. Iba asoshi la dang temulung nena pelaba metetdaksür aser konang tetushi akhüm agütsür. Yagi zünyangshir ano tali aowaa oa inyaka konang tetushi tuluba ajangzüktsü Tsüngremi la taküm, kibong aser wadang tematiba nung ajungketa moajangma. Mokokchung District nung tesayur aika rongnungi tejak mereprangi ochishia chichiba sempet aser mapa reprangteta tarutsü asoshi nükla tajung yur shirnokisa iba mapa achayangogo, nenok danga kangasa pelaba metetdaksür. Tsüngremi nenok ajak moajangma.

Sd/-
IMSUSANGLA
President
Kangtsüngtsür Telongjem Tuli

Sd/-
ALEMINLA
Secretary
Kangtsüngtsür Telongjem Tuli

Pua alir chioktsü atema Israel nung longkak aiter



Tel Aviv, Rongjui/Sept. 08 (Agencies): Israel nung longkak aitba tulutiba rongnung ka ta züngshitsüa Israel nung nisung 750,000 shi adenshia Ato Kilonser Benjamin Netanyahu indang sorkar dang Gaza nung pua alir tanüngba nisungtem chioktsü atema tezüngzüktep ka yangluang ta takhangba agütsür. Hamas teloki October 7 nü pua bener aortem rongnungi nisung trok Gaza south tsütsü longpok ka nungi ngutetogo ta Israel Army-i sangdonger hopta ka sülen tang longkak ya aiter. Pua alirtem chioktsü atema tezüngzüktep ka meyanglutetba asoshi Israel nung pua alir kinungertem aser parnok tenüng nung nokdakba telok temi Israel Ato Kilonser Netanyahu aser pa sorkar tenüng asener. Nisung 100 dak tema tang tashi mechiki Gaza nung lir, saka parnok shilem asem shi süogo südi ta amanger, ta Israel mitkari ashir. November ita tezüngzüktep agiba nung shilem ka ama Israel tepuokdak yua aliba Palestine nung nisung 240 melen Hamas-i pua alir nisung 105 chioka liasü. Hamas-i anir Palestinian fighters temi October 7 nü Israel south tsütsü amakdang nisung 240 shi pua bener ao. Iba mapang nisung 1,139 tepseta liasü.

Iba sülen Israel-i Gaza amakdang Palestine nung nisung 40,000 dak tema tepsetogo aser tesem timba aoyi kumja alimai aitsü tenzük. Israel-i occupied West Bank nunga nisung 600 dak tema tepsetogo aser Palestine nung nisung 10,000 jungnüa pua lir. Longkak aitba sentong ayonger ashiba agi, Tel Aviv nung ayongzükba rally nung nisung 500,000 aden aser linük tesem balala nung jila tem nung ayongzükba rallies nung nisung 250,000 dena liasü. Parnoki akhangba sorkari mangashi tashi aser policy memelen tashi maneni longkak aittsü, ta longkak aiter timbai ashir. Pua aliba nungi chioker Danielle Aloni-i Honibar aonung Tel Aviv rally nung jembia liasü aser iba mapang, "Ato kilonseri anogo ishika tejakdang pua aliba kinunger jakdang nokdaker onoki parnok takum anir marutetba atema tatok meshir ta ashi. Saka nü yimya aser sentong memelenshira aji komala tatok? Onoki tatok magütsütsü," ta ashi. Mapang talangka atema ceasefire aliba ajanga dang itemji akoktsü ta Israel nung timbai angateter, ta New Israel Fund nung vice president for public engagement Libby Lenkinski-i ashi.

Armed Conflict Location and Event Data Project (ACLEd) nungi data ajanga ashiba agi, taoba küm October ita nungi Israel nung ita shia longkak aitba 113 shi alir. Kasa mapang Jordan aser occupied West Bank tsungta arütsü nung lendong atalokba nung tebur asem tepset, ta Israel ketdangsür temi ashir. Allenby Bridge crossing nung khatepba nung Israel civilian asem asü, ta Israel Defense Forces (IDF) ajanga ashi. Lendong agütsürtem ya Jordan tsütsü nungi truck ka nung aru aser injang khaloktsü, ta IDF-i ashi. Video footage nunga lendong agütsür ya terminal-i jaja aru aser pai bena aliba prangbong nungi injang asemben khaloktsü aser iba sülen Israel security forces temi pa khaset. Jordan-i iba tatalokba bushisüngdang südar ta ashi, koba Israel-i amokbanga aliba tesem nung atalok, kong West Bank leni yoktsüba osettsüset tem Jordan nung gari nungi agizüka yutsür. Linük anaprongi iba tesem ya shibanga lir. Iba lendong atalokba sülen Israel-i ali ajanga Jordan-i aoba tesem ajak shibangogo, ta Israel Airports Authority ajanga ashi. Cabinet senden ka tenzüktsü lia Israel Ato Kilonser Benjamin Netanyahu-i anogo tamajung ka liasü aser asür kinunger den asükhu lemsateper, ta ashi. Kiralongrar temi asen senso asem Allenby Bridge nung tepset, ta pai ashi. Iba crossing dang King Hussein Bridge ta ajar, koba Amman aser Jerusalem tsungta lir aser West Bank aser Jordan tsungta official crossing point ibai dang lir. Aser Israel majangi West Bank-i aiba tesemji ibai dang lir.

Erdogan-i Israel anema Islamic linük lungjemtsü ayongzük



Istanbul, Rongjui/Sept. 08 (Agencies): Israel nungi "expansionism" ainba tebilemstü anema Islamic linüktemi alliance ka tentettsüla, ta Turkey Tir Recep Tayyip Erdogan-i Honibarnü ashi. West Bank nung settlement ulushiba atema Hokulbarnü longkak aitba nung shilem agir Turkish-American tsür ka Israel sepaitemi tepset ta Palestine aser Turkey ketdangsür temi ashiba sülen pai iba o ya jembia liasü. "Israel nung pei atema kisung bilemba, Israeli banditry aser Israeli state terrorism anendaksütsü ya Islamic linüktem alliance ajanga dang akoktsü," ta Erdogan-i Istanbul anasa Islamic school indang association sentong ka nung ashi. "Israel ya Gaza nung manentsü. Israel-i iba yimya ya maneni amshira, parnoki Ramallah amokbangba sülen danga tesemtem nunga tenük yoktsü. Region nung danga linüktem dangia arutsü. Parnoki Lebanon, Syria dangi arutsü. Parnoki Tigris aser Euphrates tsungta asen linük nunga tenük yoktsü," ta pai ashi. "Parnoki Gaza kizung amokbangba nung temulung sür malitsü ta sangdonger." Erdogan yagi kechi athishia jembibar mejangja, kechiaser Israel-i iba ama sangdong ya agüja mali. Hezbollah teloki anogoshi ama linük north tsütsü amakba manenra Lebanon nung "all-out war" tenzüktsü akok ta Israel lenir temi tekum dangtsü shia lir. "Iba yongji asenoki yamai jembir, 'Muslim nung tenüng nung Hamas nokdaker.' Iba yongji asenoki ya jembir, 'Hamas ya Gaza kisung kumzüka ayutsü nokdaker

masü, Islamic lima, Turkey kumzüka ayur," ta Erdogan-i ashi. Turkey-i tawa Egypt aser Syria den tesendaktep tajungba kumshitsü atema mera agiba ya 'expansionism' tebilemstü tuluba akumba anema line ka tentettsü nükjidong nung lir, ta pai ashi. Iba o jembiba nung telangzüba agüja Israel Foreign Minister Israel Katz-i Turkey lenir ya Middle East aser par nüburtem asoshi chichiba lendong ji lir ta ashi. "Erdogan-i par Hamas tembar mech Turkey nüburtem maneni tesempatem mi aser azüdokshi nung inoktsür," ta Katz-i social media X nung zülü. Israel-i Middle Eastern linüktem makdokner ta Erdogan-i tai tongloksüba ya lendong aketba tiazü o aser rara mestüba lir, ta pai ashi. "Israel-i pei litsü aser nüburtem nisung tepseter aser tashiyim amshia shi nung medemba Hamas, aser Iran-i anir aliba temenen Shiite axis nungi kumzüktsü meranger. Middle East nung moderate Arab regime tem tenüng menüktsütsü asoshi Erdogan aser Muslim Brotherhood alliance ajanga Iran den külemi küm aika inyaka arur," ta Katz-i ashi. "Erdogan ola madoktsüla aser aaktsüla." Turkey ya Israel den mapang talangka nungi tesendaktep mejungi arur, aser Gaza nung October 7 nü rara tenzükba sülen pai Israel nungeri kin ajunga samatsütsü meranger ta tai tongloksür aser Hamas ya nüchiso asoshi rarar ta tenüng sanga Jewish linük ya Nazi Germany den medemdanger.

Hokato Hotozhe Sema-i takok anguba tenüingsang agütsür



Dimapur, Rongjui/Sept. 08

(TYO): Paris Paralympics 2024 nung tebur Shot Put F57 final nung Nagaland nungi Hokato Hotozhe Sema-i otsüsüa Bronze medal anguba ya par bendanga agütsür tezü medangi meranga inyakba tanüla aliba kuli lir, aser India aser Nagaland state asoshi tejak tentetba mapang ka lir, ta State Commissioner for Persons with Disabilities ajanga sangdong ka nung ashi.

Hokato-i takok anguba ajanga linük tesem ajunga nung athletes aser talisa temang nung matamabensai aliba lanurtemi 'role model' tajung ka ama rangloksü.

Pai takok balaka ngutetba temaitsü State sorkari pa nem sen 1.5 crore agütsütsü nangzük. Sorkari iba ama tenüingsang agütsütsüsa yimya sayuba ajanga sorkari saisapong tajungtiba kumdaktsütsü asoshi bendanga agütsür inyakba sayur, ta ashi.

Iba ama teyari yagi saisaponger temulung ulushidaktsüba kisung masü saka saisapong nung jenjang tajung aliba sayur.

Hokato-i takok ngutetba ajanga Nagaland nung matamabensai aliba lanur athletes dak sempet tajung aliba sayur.

Iba ama international saisapong sapang tulu nung State nungi medal anguba ya Hokato ya mezüng lir aser ano para-athlete kati Nagaland asoshi iba ama premier level nung medal mezüngbuba ngutetba yagi ano balaka kumdaktsür, ta sangdong ajanga ashi.

State nung iba takok benjongdang disability sports ajungkettsü aser yaritsü maparen tali aser tekeraba nung inyaktsü tongtipang lir.

Para-athletes atema ki o jen, training agiba tesem aser senotsü teyari agütsüba nung rongsen indokba ajanga Nagaland nung world-class competitors tali adoktsü aser Hokato ama international tetoktepba nung alizüng tongtettsü, ta State Commissioner for Persons with Disabilities sangdong ajanga ashi.

Matamabensai alirtem indang saisapong tsütsü tarutsü

jenjang tajung lir, aser shidak teyari agütsüba ajanga tarutsü nung para-athletes tajung adokdaktsüba nung Nagaland ya ka akumtsü, ta ashi.

RPP-i tenüingsang agütsü

Paralympian Hokato Hotozhe Sema-i Paris Paralympic Games 2024 nung Men's F57 Shot Put tetoktepba nung Bronze medal ngua otsü yangluba atema tenüingsang agütsür, ta Rising People's Party (RPP) sangdong ka ajanga ashi.

Pai takok balaka ngutetba ajanga tayongzükba jenti liaka pa dak temulungtetba tulu aliba sayur.

Ano Hokato-i takok anguba tepela temaitsü Nagaland State sorkari senpet sen 1.5 crore agütsütsü nangzükba asoshi pelaba lemsateper, ta ashi.

Chief Minister Neiphiu Rio-i Arjuna Awards asoshi pa tenüng agütsütsü aser Indian Army aser Ministry of Defence den pa promotion atema inyaktsü nangzükba ya pai tenzükba aser takok asoshi tapet akum aser tetushi lir, ta RPP sangdong ajangasa ashi.

Tuensang DPDB senden nung Dr T. Ao Trophy indang jembi

Kohima, Rongjui/Sept. 08

(TYO): September ita atema Tuensang District Planning & Development Board (DPDB) senden September 7, 2024 nü Deputy Commissioner, Tuensang indang Conference Hall nung Deputy Commissioner & Vice-Chairman DPDB Tuensang, Lithrongla Tongpi Rutsa lenisüba kübok mena liasü.

Taoba senden nung lemteta aliba lepa reprangshiba sülen Board-i Dr T. Ao Trophy atema September 13, 2024 nü social work alitsü indang jembi liasü.

Iba mapang Thsapong Sangtam, DWO & member secretary, Planning Committee,

Dr. T. Ao Trophy ajanga iba asayamung atema renemshiba indang osang tongmelang agi agütsü.

DC Tuensang-i DPDB züngsem ajunga dang iba asayamung takok ngua agitetsü asoshi yariteptsü aser amalitep akatsü ayongzük.

Eastern Nagaland nung iba tournament tang mezüngbuba ayongzüktsü alinung, kodanga mamashitsüsa ayongzüktsü merangti, ta lai ayongzükba liasü.

Sao Chang College, Tuensang nung Multi-Disciplinary Institute amenoktsü atema senden nung Board-i recommendation agüja liasü.

Aryan Sabalenka-i US Open takok korang ngutetogo



New York, Rongjui/Sept. 08

(Agencies): Aryna Sabalenka-i Honibar aonung US Open final Jessica Pegula den asayaba nung takok ngutetba la asoshi Grand Slam takok korang tasembuba ajangetetogo.

Australian Open takok anguba sülen New York nung US Open takok anguba mapang World number two Sabalenka-i Pegula madak 7-5, 7-5 agi takok ngua liasü.

Set tanabuba nung Pegula ya 0-3 aliba nungi 5-3 akum saka Sabalenka-i asendenshir asaya.

Belarus nungi arishi küm 26 tain Sabalenka-i 40 winners ngutetba Angelique Kerber-i 2016 küm kasa season nung hardcourt majors anaprong koktetba sülen tetsürtem rongnung la mezüngbuba akum.

"Ni o mejembiteteter. US Open takok angutsü asoshi ni aiben anasai arua liasü aser tatem nung ni ngutetogo," ta taoba küm iba asayamung runner-up aser 2022 aser 2023 nung semi-finalist Sabalenka-i ashi.

"Nü mangdang nung kodanga tezü danga tetoktsü. Meranga inyakang. Ni küsasa

tejak tenteter."

Pegula ya Toronto nung takok ngur Cincinnati nung Sabalenka indang runner-up ama New York-i arua liasü.

Lai North American summer hard court swing nung matches 16 nungi 15 kokteta lir.

"Lai künem set ka danga kokdaktsü nungbo jungle ta bilemer. Hopta ishika jakdang lai Cincinnati nung kena kanga junga asayaogo aser la alima nung tajungtiba asayar rongnung ka lir," ta America tsürlai ashi.

"La kanga tashi tait aser ibaji ajanga nünem kecha magütsütettsü. Lai nü kabu nungi racquet agizükettsü. Ya ya tonga asayateta maongka agitetba atema pelar," ta lai ashi.

2023 US Open final nung Pegula'er linük nungi Coco Gauff-i Sabalenka tsükdaktsü aser Honibarnü asaya tenzükdang lai aibelen kar menaa liasü.

Olympic 100m gold medallist Noah Lyles, NBA star Steph Curry aser taoba Formula 1 world champion Lewis Hamilton nung densema nisung 23,000-i iba asaya repranga liasü.

Terepranger ya timba Pegula bhusema liasü, saka arishi küm 30 tain ya word number two asoshi tashi mait liasü.

Pegula yagi iba asayamung nung world number one Iga Swiatek tsükdaktsü aser semi-final nunga Karolina Muchova tsükdakja liasü.

Sabalenka-i winners 25 ngutet aser unforced errors 23 mena aser Pegula-i winners toku aser unforced errors 11 menaa liasü.

Olympic Council of Asia tir inyaktsü Raja Randhir Singh shimogo



New Delhi, Rongjui/Sept. 08

(Agencies): Taoba mapang Indian shooter Raja Randhir Singh ya Olympic Council of Asia indang tir tasenba ama shimteta India nungeri iba jenjang agiteteter mezüngbuba kumogo.

44th Olympic Council of Asia General Assembly nung taoba mapang Indian shooter Randhir Singh ya Olympic Council of Asia nung India

nunger tir mezüngbuba asütsü sangdonga liasü, kong Minister of Youth Affairs and Sports, Mansukh Mandaviya aser Asia nung linük 45 nungi saisapong tsütsü lenirtem adenshia liasü.

Küm tetenzüklen iba post asoshi candidate pa kisung liasü aser OCA representative tem ajungai mulunga pa shim.

Pa sports administration nungya 1987 küm tetsüng ajemoka Indian Olympic

Association nung Honorary Secretary General shim aser pai iba mapa 2012 tashi inyaka liasü.

Pa ya 1991 küm OCA indang Secretary General shim aser iba mapa ya 2015 küm tashi inyaker Life Vice President mapa 2021 tashi inyak aser iba sülen iba tentet indang Acting President shima liasü.

Raja Randhir Singh ya küm 60 shi saisapong den sendaktepba mechi 2014 küm Olympic Order, Silver, 2005 küm OCA Award of Merit, 2006 küm ANOC nungi Merit Award aser Lakshmi Bai National Institute of Physical Education, Government of India nungi Honorary Doctorate, Literature in Sports Science amala konang tetushi agüja lir.

BILEM DANGANG

"Pei jangraba mapa inyaktsü atemabo tezüdanga malir."